

VUOGGHIU TURNARI

(Finali 1984)

Nacii nta na muntagna ricca i cosi,
bedda e famusa ca nun ci su frasi;
u latti ri me maṭri ranni mi fici,
criscii nta li sṭrati senza pici.

Ma u ṭravagghiu mi purtàu luntanu;
a l'amici appâ-lassari nta ddu chianu.
Cuntu, a chistu echiddu, li to gesta
Picchè è l'unicu cunfuortu chi m'arresta

Misṭretta si sempri nto cori miu
cuomu me maṭri, co munnu mi mittiu .
Nun si po scurdari cu ti criau?
Cuomu si scorda u paisi natiu?

Sugnu luntanu e spissu pienzu a-ttia
unni u me saṅgu scurri e a mia risìa,
unni l'amicu è veru e nun ti nganna,
unni, quannu cci sî, nuḍḍu ti manna.

Criscinu li figghi e la vita mia scumpari
cuomu si sciddicassi sfardannumi lu cori.
Mpinsieri sulu a testa ma smunciutu,
mpinsieri sulu, chiddu ru passatu.

Campari si, assai vuogghiu campari,
picchè a vita è bedda e cci vuogghiu stari,
ma gnuornu stu munnu aiu a lassari
e o paisi miu vuogghiu turnari.

Lucio Vranca